

## Հանուն Հոր և Որդվո և Հոգվույն Սրբո, Ամեն

*«...Որովհետև ով որ բարձրացնում է իր անձը, կխոնարհվի,*

*և ով որ խոնարհեցնում է իր անձը, կբարձրացվի»*

*(Ղուկ 18.9-14)*

Հոգեշնորհ Հայր Սուրբ, արժանապատիվ և բարեշնորհ հայրեր, սիրելի հավատավոր քույրեր և եղբայրներ,

Աստծո կամքով և Սուրբ Հոգու շնորհումով նոյեմբերի 13-ին, Ն.Ս.Օ.Տ.Տ. Գարեգին Բ Ամենայն Հայոց Կաթողիկոսի օրհնությամբ, ձեռնադրության քրիստոսահաստատ սուրբ խորհրդի միջոցով 6 նորընծա քահանաներով արժանացանք Հայոց Եկեղեցու օծյալ մշակների շարքերը համալրելու բարձր և պատասխանատու կոչմանը:

Վստահաբար որևէ պատասխանատու առաքելության կոչվելը միանգամից չի լինում, այլ իրենից ենթադրում է նախընթաց մի ճանապարհ: Հոգևոր ծառայության ասպարեզում պարտադիր պայման է այդ ճանապարհի ընթացքում ճիշտ, փորձառու և սրտացավ մարդկանց ուղեկցությունը: Ուստի խոսքիս նախամուտին ցանկանում եմ առանձնահատուկ սիրով և ջերմությամբ հիշել և իմ շնորհակալական խոսքը ուղղել բոլոր այն անձանց, ովքեր եղան ինձ համար կյանքի ուսուցիչ, ընկեր և Քրիստոսի լծակից:

Աստծուն սիրել առաջինը սովորեցի իմ **ծնողներից**, որոնք վայրկյան անգամ չվարանեցին ինձ բերելու եկեղեցական ասպարեզ, իսկ այստեղ իմ առաջին քայլերը սկսեցի՝ ներշնչվելով Մարտակերտի հոգևոր Հովիվ՝ **լուսահոգի Տեր Բարսեղ քին. Անդրյանի համեստ ու խոհեմ կերպարով**: Ավարտելով Գևորգյան Հոգևոր Ճեմարանը, որը իմ խորին համոզմամբ հայ իրականության մեջ ամենալավ ուսումնական հաստատությունն է՝ իր բոլոր թերություններով և առավելություններով հանդերձ, հանդիպեցի իմ կյանքի հաջորդ ներշնչան աղբյուրին՝ **Նարեկ սարկավազ Պետրոսյանին**, ով երբեմն ավելի էր հավատում իմ ուժերին, քան ես ինքս: Միասին անցանք կյանքի կարճ, բայց բավականին հարուստ մի ընթացք, որի պայմանական ավարտին Նարեկ սարկավազը վերափոխվեց երկինք, իսկ իմ կյանքը վերափոխվեց այստեղ:

Ծառայության կոչվելով Հայոց Բանակում՝ երջանիկ բախտավորություն ունեցա ծառայելու Գերաշնորհ **Տեր Վրթանես եպս. Աբրահամյանի** առաջնորդության ներքո, ով **եղավ և այսօր էլ է** ինձ համար հոգևոր ծնող, ավագ ընկեր, և մեծ պատիվ էր **Նրա ձեռամբ ստանալու Քահանայական Սուրբ կոչումը**: Այսօր շաունակում եմ ծառայել Հայոց

Բանակում ՀՀ ԶՈՒ հոգևոր առաջնորդ՝ **Տեր Մովսես Վրդ. Սարգսյանի** հոգածու առաջնորդությամբ, ում հետև ևս բախտ է վիճակվել դեռևս 2015 թ-ից սկսյալ անցնել հաջողություններով ու փորձություններով լի ծառայության մի ընթացք: Ուզում եմ շնորհակալություն հայտնել նաև Տեր Վարազդատ քին. Նաջարյանին, ով մեր, այսպես կոչված **Նարեկյան ընկերության շրջանակի** անբաժան մի մասնիկն է, և ով պատիվ է արել այսօր իր փորձառությամբ օգնելու իձ իմ անդրանիկ պատարագի ընթացքին, նաև **Պարոն Արշավիր Գաբուշյանին**, ով մշտապես աջակցում է և անկեղծորեն ուրախանում իմ բոլոր ձեռքբերումներով:

Իմ սրտի սերն ու երախտիքն եմ հայտնում կյանքիս ընկերոջը, **Միրելի տիկնոջ**, ով վայրկյան անգամ չվարանեց հանձնառու լինել՝ ինձ հետ կիսելու և թեթևացնելու քահանայական քաղծր լուծը: Շնորհակալ եմ բոլոր նրանց, ովքեր անկեղծորեն ուրախանում են և աղոթում Տիրոջ անարժան ծառայիս համար:

**Իրապես մեծ է Քահանայական կոչումը և սքանչելի, բայց անպտուղ է, եթե հիմնված չէ խոնարհության վրա**, ուստի իսկապես ուրախ եմ, որ այսօր անդրանիկ Պատարագի Ավետարանը համընկել է Քրիստոսի կողմից տրված խոնարհության դասի հատվածին, որ հետայսու մշտապես պետք է հիշեցնի, որ չկորցնենք այդ կարևոր առաքինությունը:

Այսօրվա ավետարանում Հիսուս պատմում է մի առակ փարիսեցու և մաքսավորի մասին, որին շատերը քաջատեղյակ էք: Ասում է՝ *«Երկու մարդ տաճար ելան աղոթքի կանգնելու. մեկը՝ փարիսեցի, մյուսը՝ մաքսավոր: Փարիսեցին կանգնած էր մեկուսի և, ինքն իրեն, այս աղոթքն էր ասում. «Աստված իմ, շնորհակալ եմ Քեզնից, որ ես նման չեմ ուրիշ մարդկանց, ինչպես՝ հափշտակողները, անիրավներն ու շնացողները, և կամ ինչպես այս մաքսավորը. այլ շարաթը երկու անգամ ծոմ եմ պահում և տասանորդ եմ տալիս իմ ամբողջ եկամտից»:* Իսկ մաքսավորը կանգնած էր մեկուսի և չէր իսկ կամենում իր աչքերը երկինք բարձրացնել, այլ ձեռնում էր կուրծքը և ասում. *«Աստված, ների՛ր ինձ՝ մեղավորիս»:* Ասում եմ ձեզ, սա՛ իջավ իր տունը արդարացած, ոչ թե մյուսը. **Որովհետև ով որ բարձրացնում է իր անձը, կխոնարհվի, և ով որ խոնարհեցնում է իր անձը, կբարձրացվի»:**

Ավետարանական ամենագեղեցիկ և ուսանելի հատվածներից է այս առակը, որպեսզի կարողանանք ավելի ընկալելի դարձնել առակի պատգամը, նախ փորձենք ավելի լավ պատկերացում կազմել գործող անձանց մասին և պատմական այն ժամանակահատվածի մասին, երբ պատմվեց այն:

Փարիսեցիները ներկայացնում էին հրեա-կրոնական մի կուսակցություն, որոնց հիմնական գործը օրենքի ուսումնասիրությունն էր և գործադրումը: Նրանք բավականին ազդեցիկ դիրք ունեին հասարակության մեջ, բայց խորանալով օրենքի տառի մեջ, երբեմն ընկնում էին ծայրահեղությունների մեջ և կատարում էին ավելին,

քան պահանջում էր օրենքը, այս ամենը սնուցում էր նրանց սնափառությունը և հպարտությունը: Օրինակ հրեական օրենքը նախատեսում էր միայն պարտադիր պահք՝ Քավության օրվա համար, բայց նրանք, ովքեր ցանկանում էին առանձնահատուկ արժանիքներ ձեռք բերել, ծոմ էին պահում նաև երկուշաբթի և հինգշաբթի օրերին: Հատկանշական է, որ այդ օրերը **շուկայի օրերն էին**, երբ Երուսաղեմը լի էր գյուղացիներով: Նրանք, ովքեր ծոմ էին պահում, սպիտակեցնում էին Իրենց դեմքերը և մարդկանց առջև էին երևում խոժոռ շորերով, և այդ օրերը իրենց բարեպաշտությունը ունենում էր առավելագույն չափով հանդիսատեսներ:

Նրանք այնքան վստահ էին, որ իրենց այս գործերով պիտի փրկվեին, որ բոլորին նայում էին վերևից: Ասում են, որ մի անգամ Փարիսեցի **Ռաբբի Միսեուն բեն Ջոկայր ասել է**. *«Եթե աշխարհում միայն երկու արդար մարդ կա, ապա ես և իմ որդին այդ երկուսն ենք, եթե կա միայն մեկը՝ դա ես եմ»:*

Հիշենք, որ այդ ժամանակաշրջանում Իսրայելը գտնվում էր Հռոմեական տիրապետության տակ: Ովքե՞ր էիր մաքսավորները. նրանք հարկահավաքներն էին, հիմնականում ազգությամբ հրեա, բայց աստիճան էին ժողովրդի աչքին նախ այն պատճառով, որ իրենց ազգակիցներից հարկերը հավաքում էին ոչ թե Իսրայելի, այլ Հռոմի համար, և երկրորդ, նրանք հաճախակի էին դիմում չարաշահումների և ավել գումար գանձում իրենց գրպանի համար, որովհետև հռոմեական իշխանությունները նրանց վարձից բացի արտոնել էին ինչքան կարող են՝ իրենց համար առանձին շահույթ ստանալ: Մաքսավորները համարվում էին ամենաարհամարված և մեղավոր մարդիկ:

Հիմա վերադառնանք մեզ ծանոթ փարիսեցուն և մաքսավորին: Հիսուսի պատմած առակի Փարիսեցին լիովին տեղավորվում էր փարիսեցիների մասին եղած վերոնշյալ պատկերացումների մեջ: Այո, իսկապես նա ճիշտ էր ասում, որ առաքինի է, կատարում է օրենքն ամբողջությամբ, ծոմ է պահում պահանջվածից ավելի, բայց ինչու նրա աղոթքը լսելի չեղավ Աստծուն: Որովհետև, ինչպես ավետարանական բնագրերից մեկը շեշտադրում է, նա **ինքն իրեն այս աղոթքն էր անում**: Այսինքն փարիսեցին չէր եկել աղոթելու, այլ ինքն իրեն էր աղոթում և եկել էր Աստծուն ներկայացնելու, թե ինչ լավն է ինքը, որ նման չէ ոչ մեկին, առավել ևս իր հետ աղոթքի կանգնած մաքսավորին, ու կարծես թե կարիք էլ չունի Աստծո ողորմության:

Մաքսավորը կոտրված սրտով կանգնած, ինչ-որ տեղ նաև ազդվելով և ամաչելով փարիսեցու հպարտ կեցվածքից, ծեծում էր իր կուրծքը, անգամ չէր համարձակվում գլուխը բարձրացնել և անդադար ողորմություն էր խնդրում: Առակի տրամաբանությունը մեզ հուշում է, որ մաքսավորը իրեն համեմատում էր Աստծո սրբության հետ, քաջ գիտակցում էր իր մեղավոր լինելը և ուներ հստակ որոշում՝ անկյալ վիճակից ոտքի կանգնելու: Միով բանիվ մաքսավորը արժանացել էր առաջին երանիին. *«Երանի հոգով աղբատներին, որովհետև նրանցն է Երկնքի արքայությունը»:*

**Նա հստակ կերպով տեսնում էր իր հոգևոր աղքատությունը:** Հարկ է հիշել, որ առակի մեջ հիշված արդարացած մաքսավորի բավականին ցայտուն մի օրինակ ունենք. Մատթեոս ավետարանիչը՝ Ղևի անվանայալ, որ դարձավ Քրիստոսի 12 աշակերտներից մեկը և առաջին ավետարանի հեղինակը:

Ում էր ուղղված այս առակը և որն է այն դասը, որ պիտի սովորենք և կիրառենք մենք մեր կյանքում, և մի թե այսօր մեր մեջ էլ չկան փարիսեցիներ ու մաքսավորներ: Ավետարանը պատասխանում է այս երկու հարցերին հստակորեն: Սկզբում ասվում է. **«Այս առակն էլ ասաց ոմանց, որոնք իրենք իրենցով պարծենում էին, թե արդար են, և արհամարհում էին ուրիշ շատերին»**, իսկ վերջում Հիսուսը եզրակացություն է անում. **«Որովհետև ով որ բարձրացնում է իր անձը, կիտնարհվի, և ով որ խնարհեցնում է իր անձը, կբարձրացվի»:**

Սիրելիներ, Մեր Տերը հստակ կերպով մեզ սովորեցնում է, որ...

- Հպարտ մարդը չի կարող իսկապես աղոթել: Դրախտի դարպասն այնքան ցածր է, որ ոչ ոք չի կարող մտնել այնտեղ, եթե ծնկի չգա.
- Որևէ մեկը, ով արհամարհում է իր մերձավորներին, չի կարող աղոթել: Աղոթքի ժամանակ մենք չպետք է վեր բարձրացնենք մեզ մեր մերձավորներից: Մենք, Աստծո նորմության գահի առաջ ծնկած, պետք է հիշենք, որ մեկն ենք մեղավոր, տառապող, վշտացած մարդկության մեծ բանակից:
- Եվ վերջապես՝ ճշմարիտ աղոթքը բխում է մեր կյանքը Աստծո կյանքի հետ համեմատելուց: Անկասկած այն ամենը, ինչ Փարիսեցին ասաց, ճշմարիտ էր և նա ընդհանրապես նման չէր այն մաքսավորին: Բայց այստեղ հարցն այն չէ, թե **«արդո՞ք ես նույնքան լավն եմ, որքան իմ ընկերները»**, այլ այն, թե **«Արդո՞ք ես նույնքան լավն եմ, որքան Աստված»:** Ազլիացի մի աստվածաբան պատմում է. - Մի անգամ ես գնացքով ճանապարհորդեցի դեպի Անգլիա: Երբ մենք անցնում էինք Յորքշիրյան ավազաններով, ես տեսա մի փոքր սպիտակած տնակ և ինձ թվաց, թե փայլում է գրեթե փայլուն սպիտակությամբ: Մի քանի օր անց ես վերադարձա Շոտլանդիա: Ձյունը տեղացել էր ու խորը պառկած էր շուրջբոլորը: Մենք նորից եկանք փոքրիկ սպիտակ տնակի մոտ, բայց այս անգամ նրա ճերմակությունը թանձր ու կեղտոտ էր ու գրեթե մոխրագույն՝ ձյան կուսական սպիտակության համեմատ:

Հետևաբար, սիրելի հավատացյալներ, ամեն ինչ կախված է նրանից, թե ինչի հետ ենք մենք մեզ համեմատում: Ներկա աշխարհում, երբ ամենուր մրցավազքի ասպարեզ է բացված, երբ մանկուց մեզ սնուցում են բոլորից լավը, ամենալավը լինելու ոչ-քրիստոնեկան գաղափարաբանությամբ, այս արագընթաց հոսքից հոգնած մի պահ կանգ առնենք և տեսնենք, **որ երբ մենք մեր կյանքը դնում ենք Հիսուս Քրիստոսի կյանքի**

*և Աստծո սրբության կողքին, մեզ մնում է միայն մաքսավորի հետ աղաղկել՝ «Աստված  
ողորմիր ինձ՝ մեղավորիս»: Ամեն:*